

05 MAI

**SLUJBA
SF. CUVIOȘI
VARLAAM
ȘI GHEDEON
DE LA
SERPUHOV**

MINEIUL-RU



Месяца мая в 5-й день Преподобных Варлаама и Гедео́на, Серпуховских

На велицей вечерни

На Господи, возвах: **стихиры, глас 1.**

Подобен: О, дивное чудо:

О, дивное чудо! / Пречистая Дева Богородица / святителю Алексею обитель создати повелевает, / Варлаама преподобнаго видения сподобляет / и от слепоты того купно с Гедеоном исцеляет, / икону же Свою страждущим от винопития являет, / недугующих от болезней избавляет, / страстей течение уставляет. / **О,** Всемилостивая Владычице, / молитвами преподобных Варлаама и Гедео́на / подавай душам нашим / мир и велию милость.

О, дивное чудо! / Знамение Владычицы на земли явился / и чудным звоном место обители Ея указася, / идеже иноки благочестивии вселишася / и подвиги своими просияша. / Веселися, граде Серпухов, / имея в себе святых молитвенники, / предстоящая Престолу Всевышняго. / Вы же, преподобнии Варлааме и Гедео́не, / яко имущии дерзновение ко

Пресвятей Троице/ испросите душам нашим/
мир и велию милость.

О дивное чудо!/ В пустынном месте обитель
дивная явися/ и яко сад прекрасен показася,/ в
нем бо иноки благочестивии/ плоды
добродетелей принесоша./ Торжествуй днесь,
обителе Владычня,/ имущи заступники
непостыдныя/ и ходатаи предивныя./ Вы же,
Варлааме и Гедеоне боголюбивии,/ молитве
Владыку Вседержителя,/ мир всему миру
даровати/ и душам нашим велию милость.

Ины стихиры преподобному Варлааму, глас 6.

Подобен: Все отложше:

Преподобне отче Варлааме,/ послушания
добрый рачителю!/ Ты, земную красоту и славу
отринув,/ Христа всем сердцем возлюбил еси/ и,
святителем Алексием направляемь,/ обитель
Пречистой Богородице устроил еси,/ в нейже
равноангельно пожил еси./ Ныне же, во
обителях Небесных пребывая,/ за ны усердно
Господу молися/ даровати душам нашим мир и
велию милость.

Преподобне отче Варлааме,/ молитвенниче
усердный ко Пресвятей Троице!/ Ты, избранник
Пречистыя Девы явився,/ Тоя благословением в
пустынном месте обитель создал еси,/ идеже
множество иноков собравшеся/ Христу Богу

усердно послужиша / и Пречистую Его Матерь
возвеличиша. / И ныне сохраняй обитель сию, /
нам же, творящим твою память, / теплый
предстатель пред Господем буди.

**Стихиры преподобному Гедеону,
глас и подобен тойже:**

Все отложив житейское мудрование / и мирскую
прелесть оставив, / преподобне отче Гедеоне, / во
обитель Владычицы Девы пришел еси, / идеже, в
послушание старцу Варлааму предався, /
истинное смирение стяжал еси / и плоть
потщался еси покорити духу, / память же
смертную пред очима своима имея, / во бдении,
пощении и молитве пребывал еси / и тако Богу
угодил еси. / Темже молим тя: / помози и нам, с
любовию к тебе притекающим, / Царствие
Небесное улучшить.

Глас Господень услышав: / аще кто хочет по Мне
идти, / да отвержется себе, и возмет крест
свой, / и по Мне грядет, / крест свой на рамо
взем, / Христу усердно последовал еси, /
преподобне отче Гедеоне, / и, в слове Божиим
день и ночь поучаяся, / заповеди Господни на
скрижалех сердца написал еси. / Темже молим
тя: / помози и нам, с любовию к тебе
притекающим, / благое иго Христова смиренно
нести.

Слава, глас 8:

Богомудрая двоице доброхвальных отец, /
благосердне Варлааме и добронравне Гедеоне, /
ревностию Христовою распалаемии, / в
преподобии и правде на земли просияли есте, /
ныне же на Небеси с лики всех святых /
Престолу Пресвятыя Троицы предстоите. /
Поминайте нас, священную память вашу
совершающих, / мы бо чада ваша и вас на
помощь призываем, / просяще вами прияти мир
и велию милость.

И ныне, Богородичен: Царь Небесный:

Вход. Прокимен дне. И чтения.

Премудрости Соломоновы чтение (глава 3):

Праведных души в руке Божией, и не
прикоснется их мука. / Непщевани быша во
очесех безумных умрети, и вменися озлобление
исход их. / И еже от нас шествие сокрушение,
они же суть в мире. / Ибо пред лицом
человеческим аще и муку примут, упование их
безсмертия исполнено. / И в мале наказани
бывше, великими благодетельствовани будут, /
яко Бог искуси я и обрете их достойны Себе. /
Яко злато в горниле искуси их и яко всеплодие
жертвенное прият я. / И во время посещения их
возсияют и, яко искры по стеблию, потекут. /

Судят языком и обладают людьми, и воцарится Господь в них во веки. / Надеющиеся Нань разумеют истину и вернии в любви пребудут Ему / Яко благодать и милость в преподобных Его, и посещение во избранных Его.

Премудрости Соломоновы чтение (главы 5 и 6):
Праведницы во веки живут, и в Господе мзда их, и попечение их у Вышняго. / Сего ради примут Царствие благолепия и венец доброты от руки Господни, / зане десницею покрывает я и мышцею защитит их. / Приимет всеоружие рвение свое и вооружит тварь в месть врагом. / Облечется в броня правды и возложит шлем, суд нелицемерен. / Приимет щит непобедимый преподобие, / поострит же напрасный гнев во оружие; / споборет же с ним мир на безумныя. / Пойдут праволучныя стрелы молниины / и, яко от благокругла лука облаков, на намерение полетят. / И от каменометныя ярости исполнь падут грады, / вознегодует на них вода морская, реки же потопят я нагло. / Сопротив станет им дух силы, и, яко вихор, развеет их / и опустошит всю землю беззаконие, и злодейство превратит престолы сильных. / Слышите убо, царие, и разумеите, навикните, судии концов земли. / Внушите, держащии множества и гордящися о

народех язык,/ яко дана есть от Господа держава вам и сила от Вышняго.

Премудрости Соломоновы чтение (глава 4):

Праведник аще постигнет скончатися, в покои будет./ Старость бо честна не многолетна, ниже в числе лет исчитается./ Седина же есть мудрость человеком, и возраст старости житие нескверное./ Благоугоден Богу быв, возлюблен бысть, и живый посреде грешник преставлен бысть./ Восхищен бысть, да не злоба изменит разума его, или лесь прельстит душу его./ Рачение бо злобы помрачает добрая, и парение похоти пременяет ум незлобив./ Скончався в мале, исполни лета долга./ Угодна бо бе Господеви душа его, сего ради потщася от среды лукавствия./ Люди же видевшие и не разумевше, ниже положше в помышлении таковое./ Яко благодать и милость в преподобных Его, и посещение во избранных Его.

На литии стихиры, глас 3:

Приидите, вернии,/ возвеличим в песнех честныя отцы,/ Варлаама богосветлаго¹ и Гедеона преявственнаго²:/ светильники Неприступнаго Света Христова,/ сосуды

¹ Богосветлый - осиянный Божественным светом

² Проявственный - светлый

честныя Духа Святаго,/ ангелом собеседники и
преподобным сопричастники,/ веры Христовы
истинныя исповедники,/ покаяния наставники
и благочестия учителя,/ тии бо явишася соль
земли и свет миру.

Сшествуим вси радостно во обитель Владычню/
и восхвалим преподобныя отцы,/ телесы бо
своими в ней почивше,/ чудеса преславная
содевают верою приходящим:/ болящим подают
исцеление,/ погибающим от страстей
свобождение,/ маловерным благодатное
укрепление,/ страждущим в бедах скорое
поможение,/ ожесточенным сердца
примирение,/ всем же христианом веры
истинныя познание и утверждение.

Слава, глас 8:

Рождия³ доброплодная суще,/ преподобнии
Варлааме и Гедеоне,/ на лозе Христовой
произрасли есте,/ уставов же отеческих
истиннии ревнителие явльшеся,/ заповеди
Господни усердно исполнили есте/ и, труды ко
трудом прилагавше,/ молитву непрестанно
совершали есте:/ Иисусе, Сыне Божий, помилуй
нас.

И ныне, Богородичен, глас тойже:

К Тебе Госпоже, Пречистая, прибегаем,/ яко
Источнику спасения нашего,/ вшедши бо во

³ Розга - ветвь

святое святилище храма, / воспиталася еси во
Святилище Бога Вышняго / и, вместивши
Избавителя во утробе Своей, / Престол Царя
славы явилася еси. / Темже с верою и любовью
вопием Ти: / Милостивое Пристанище, Покров и
Заступление нам буди.

На стиховне стихиры, глас 5.

Подобен: Радуйся, Живоносный Кресте:
Радуйтесь, непобедимии воины Христови, /
преподобнии Варлааме и Гедеоне, / заповеди бо
евангельстии усердно соблюдше, / истиннии
подобницы Господни явистесь, / кротость и
смирение стяжавше, / врагу мужественне
противостасте. / Ныне же, во Царствии Небеснем
ликовствующе, / молитве Пресвятую Троицу /
низпослати нам дух любви и смиреномудрия.

Стих: Восхвалятся преподобнии во славе / и
возрадуются на ложах своих.

Радуйся, всеблаженне отче Варлааме, / небесный
человече и земный ангеле, / верный таинниче
святителя Алексия / и добрый его послушниче! /
Ты, в пустынном месте усердно подвизаяся, /
обитель Владычицы Девы воздвигл еси. / Ныне
же, в Небесных обителях водворяясь, / моли
Пречистую Богородицу / низпослати нам дух
кротости и целомудрия.

Стих: Блажени вси боящиися Господа,/ ходящии в путех Его.

Радуйся, обитель Владычня,/ града Серпухова похвало и украшение,/ ты бо благодатишное пристанище спасения/ верным людем явилася еси./ Мы же, ублажающе святую память отец твоих,/ преподобных Варлаама и Гедеона,/ исцеления дары приемлем/ и венчавшаго их Христа прославляем,/ яко Спаса душ и телес наших.

Слава, глас 4:

Преподобне отче Варлааме,/ подвиг пустыннаго жития являя,/ монахов множество собрал еси/ и, словом Божиим непрестанно тех наставляя,/ по лестнице добродетелей к Небесным селением возвел еси./ Таже и ученик твой, предивный Гедеон,/ блаженства праведных взыскуя,/ тебе, яко мудрому наставнику,/ всего себе в послушание предаде/ и житию твоему добре поревнова./ Ныне же молим вас, отцы преподобнии,/ научите нас право шествовати,/ да Царствия Небеснаго сподобимся.

И ныне, Богородичен, глас тойже:

Днесь Боговместимый храм, Богородица,/ в храм Господень приводится,/ и Захария Сию приемлет:/ днесь святая святых радуются,/ и лик ангельский таинственно торжествует./ С нимиже и мы, празднующе днесь, с Гавриилом

возопиим:/ радуйся, Благодатная, Господь с Тобою,/ имей велию милость.

Тропарь святых, глас 4:

Божественною ревностию распалаеми,/ вся мирская пристрастия отринули есте,/ благое иго Христово усердно понесше,/ образ спасения верным показали есте,/ обитель Владычицы Девы воздвигше,/ град Серпухов радостию исполнили есте./ И ныне, Престолу Божию предстояще,/ молитесь, преподобнии Варлааме и Гедоне,/ спаситися душам нашим.

На утрени

На Бог Господь: тропарь преподобных дважды.
Слава, и ныне, Богородичен: Еже от века утаеное:

По 1-м стихословии седален, глас 3:

Божественныя любве взыскуя,/ в пустынное место вселился еси, блаженне Варлааме,/ и обитель во имя Пречистыя Девы воздвигл еси,/ идеже, сеяй доброе семя слова Божия в сердца приходящих,/ дивный плод от древа добродетелей,/ духоноснаго Гедоне, израстил

еси./ С нимже молися Сладчайшему Господу
Иисусу,/ да спасет души наша.

Слава, и ныне, Богородичен:

Дивному вхождению Твоему во святая святых,
Дево Всепетая,/ вся силы Небесныя
удивишася,/ Серафими же воспеша песнь
хвалебную,/ ибо явился всему миру
Боговместимый Храм,/ источающий спасение
всем с верою и любовью к Тебе притекающим.

По 2-м стихословии седален, глас 2:

Земную красоту и славу временную презрев,/
Христа единого возлюбил еси, преподобне
Гедеоне,/ и, крест свой взял,/ Божественней
воли всеусердно покорился еси/ и лестницею
добродетелей Небеснаго отечества достигл еси./
О, предивне отче,/ истинный учениче и
послушания рачителю,/ молися Христу Богу
низпослати нам дух кротости и
смиреномудрия.

Слава, и ныне, Богородичен:

Яко Лоза истинная, Дево Пречистая,/
прекрасный Грозд, Христа, возрастила еси,/
источающий верным вино спасительное,
веселящее души и телеса./ Темже со умилением
к Тебе припадаем и тепле вопием:/ напои нас
потокм Божественныя сладости,
Всенепорочная Владычице.

Величание:

Ублажаем вас, / преподобнии отцы наши
Варлааме и Гедеоне, / и чтим святую память
вашу, / наставницы монахов / и собеседницы
ангелов.

Псалом избранный: Терпя, потерпех Господа:

По полиелеи седален, глас 5:

Егда, блаженнии, к Божественному желанию
ум свой вперисте, / тогда оставили есте вся долу
влекущая мудрования / и, в пустыню
всельшеся, / терние страстей искоренили есте и
добродетельми процвели есте. / Темже,
стяжавше богатство неотъемлемое на Небесех, /
отцы преподобнии Варлааме и Гедеоне, / молитесь
Христа Бога согрешений оставление даровати /
чтущим святую память вашу.

Слава, и ныне, Богородичен:

Престол Небесный и Храм одушевленный
явилася еси, Пренепорочная Владычице, / Хлеб
вечныя жизни верным подавающая / и
избавляющая достояние Твое от всех наветов
вражиих. / Сподоби нас в страшный час
испытания прощение улучшить / и Царствия
Небеснаго достигнути.

Таже степенна, 1-й антифон 4-го гласа.

Прокимен, глас 4: Честна пред Господем / смерть
преподобных Его. **Стих:** Что воздам Господеви о

всех, яже воздаде ми? **Всякое дыхание:**
Евангелие от Матфея, зачало 43.

По 50-м псалме стихира, глас 6:

Иже на земли ангелов/ и на Небеси человеков
Божиих,/ мира благое украшение,/ монахов и
постников похвалу,/ славных отцев почтим,/
насаждени бо в дому Господни,/ процветоша,
яко кедри в пустыни,/ умноживше стадо
Христово словесных овец/ в преподобстве и
правде.

Канон преподобных отец Варлаама и Гедеоны,
глас 1.

Песнь 1

Ирмос: *Песнь победную поим вси Богу,/*
сотворшему дивная чудеса мышцею высокою/ и
спасшему Израиля, яко прославися.

Припев: *Слава Тебе, Боже наш, слава Тебе.*

Господи, Боже, подаждь ми силу и разум,/ да
достойно прославлю преславныя подвиги
угодник Твоих, преподобных Варлаама и
Гедеоны,/ Светом бо невечерним озаряемии,/
Престолу Твоему предстоят/ и молятся о
спасении верою творящих память их.

Припев: *Преподобнии отцы Варлааме и Гедеоны,*
молите Бога о нас.

Доброплодная лоза винограда Христова, / рукою святителя Алексия насажденная, / явился еси, преподобне Варлааме. / Темже основание обители Владычния в пределах града Серпухова положил еси, / да вси приходящий спасение улучают.

Добродетельному житию святых отцев поучаяся, / кротость, смирение и послушание возлюбил еси, пречудне Гедеоне, / и, всю надежду на Бога возлагая, / мужественно взыграна страстей препобедил еси.

Богородичен: Милостивым предстательством, Пренепорочная Владычице, / покрый от всяких напастей и вражиих ухищрений рабы Твоя, / Тя бо имамы Избавительницу и Спасение душам нашим.

Песнь 3

Ирмос: *Да утвердится сердце мое в воли Твоей, Христе Боже, / Иже над водами Небо утверждей второе / и основавый на водах землю, Всесильне.*

Слово Божие, яко семя, в сердце своем приемше / и сторичный клас добродетелей возрадивше, / плод духовный любве, мира и долготерпения принесли есте. / Темже и нас, отцы богосветлии, / соделайте причастники подвига вашего.

Господнею любовью озаряемь, преподобне отче Варлааме,/ в послушание Царице Небесней вдался еси/ и в пустынном месте, близ града Серпухова, обитель во имя Ея воздвигл еси,/ идеже, многия ученики собрав,/ путь спасения им указал еси.

Очищая душу свою от тлетворных страстей,/ блаженный плач стяжал еси,/ избранниче Христов отче Варлааме./ Сего ради мир душевный обрел еси/ и смиренному Гедеону с прочими ученики путь спасения показал еси.

Богородичен: Вереи адовы сломишася и заклеи вечнии сокрушишася преславным Рождеством Твоим,/ явился бо Избавление всем человеком./ Сего ради зовем:/ радуйся, Пречистая Дево, верных Спасение.

Седален, глас 4:

Вся временная в мире сем оставивше, богомудрии Варлааме и Гедеоне,/ Крест Христов на рамена подъяли есте/ и, Тому Единому смиренно последовавше,/ блаженства вечнаго достигли есте./ И ныне молим вас,/ прощение грехов у Господа испросите нам,/ любовь творящим святую память вашу.

Слава, и ныне, Богородичен:

Богородице, всех Царице,/ Ты еси Престол Царя Небеснаго,/ Неупиваемая Чаша нашего

спасения,/ Клас, израстивший нам Хлеб
живота,/ от Негоже ядше, живи будем/ и не
взалчем во веки.

Песнь 4

*Ирмос: Духом провидя, пророче Аввакуме,
Словесе воплощение,/ проповедал еси, вопия:/
внегда приблизитися лето, познаешися,/
внегда приити времени, покажешися./ Слава
силе Твоей, Господи.*

Храм Духа Святаго явилисья есте, преподобнии
отцы наши Варлааме и Гедеоне,/ егда всякое
нечестие от сердца своего отгнавше,/
невозвратным помыслом Христу последовали
есте, вопиюще:/ слава силе Твоей, Господи.

Тихостию нрава и кроткими словесы/ многия во
обитель привлекл еси, преподобне Варлааме,/
братолюбием и незлобием добродетельному пути
научая, да с радостию воспевают:/ слава силе
Твоей, Господи.

Престолу Божию предстоя и райския сладости
наслаждаяся,/ помяни нас во святых твоих
молитвах, отче Гедеоне,/ да, слезами покаяния
души очистивше,/ купно с тобою Христу
воспоим:/ слава силе Твоей, Господи.

Богородичен: Всем, притекающим к Тебе,/
Предстательница и Помощница явилася еси,
Пренепорочная Владычице,/ избавляющи от

работы вражия / и на путь спасения
наставляющи.

Песнь 5

*Ирмос: Твой мир даждь нам, Сыне Божий, / иного
бо, разве Тебе, Бога не знаем, / Имя Твое
именуем, / яко Бог живых и мертвых еси.*

В слове Божиим ревностно поучающесе,
преподобнии Варлааме и Гедеоне, / познали есте
како подобает волю Господню творити. / Темже
почесть трудов своих прияли есте / и
светоносную благодать Святаго Духа улучили
есте.

Добро есть жити в заповедех Господних, / сиче
поучал еси ученики твоя, богомудре Варлааме. /
Мы же, внемлюще гласу твоему, ныне молим
тя: / настави нас на стези спасения / и в
Царствие Небесное пути наша управи.

Утешение во Христе ища / и слезы покаяния о
гресех проливая, преблаженне отче Гедеоне, /
мудрому учителю твоему во всем последовал
еси. / Темже и возмогл еси шатание лукаваго
низложить / и пристанища Небеснаго
достигнути.

Богородичен: В недузех и всех обстояниих к
Тебе, Владычице, припадаем / и, яко Надежде
нашего спасения, тепле вопием: / даруй нам дух

сокрушения и смирение сердца,/ да благодарне
воспеваем величия Твоя.

Песнь 6

Ирмос: Пророка Иону подражая, вопию:/ живот
мой, Блаже, свободи из тли/ и спаси мя, Спасе
мира, зовуща: слава Тебе.

Непрестанную молитву в сердце имуще,
досточуднии отцы,/ собеседницы Небесных Сил
явились есте./ С нимиже помозите и нам
чистоту сердечную стяжати, да зовем:/ Спасе
мира, слава Тебе.

Пламенной любовью ко Христу возгоревся,/ все
упование свое на Господа возложил еси, отче
Варлааме,/ и непрестанно во псалмах и пениих
и песнях духовных Ему взывал еси:/ Спасе
мира, слава Тебе.

Мудрому учителю твоему вседушно в
послушание вдався/ и во всем волю свою
отсекая, премудре Гедеоне,/ всем сердцем волю
Божью исполнил еси, воспевая:/ Спасе мира,
слава Тебе.

Богородичен: Со архангелы и ангелы песнь
хвалебную воспоим Царице Богородице,/ Та бо
молит Сына Своего, Христа Бога нашего,/
даровати нам прежде конца покаяние и велию
милость.

Кондак, глас 8:

Избранныи угодницы Христовы, / служителие усерднии Владычицы Богородицы, / истиннии послушницы святителя Алексия, / Варлааме и Гедоне богоблаженнии, / души своя кротостию, смирением и чистотою украсившии, / сосуди предивнии Святаго Духа явились есте. / Мы же, прославляюще подвиги ваша, / с верою и любовию взываем: / радуйтесь, преподобнии отцы, усерднии о нас пред Богом молитвенницы.

Икос:

Вся земная оставльше, / обрели есте бесценный бисер, Христа Бога, / любомудрии Варлааме и Гедоне, / и, крест свой на рамо взявше, / последовали есте Ему невозвратным помыслом, / тщание о спасении непрестанно имуще. / Темже вопием вам:

Радуйтесь, Ангелов подражателие преславнии; радуйтесь, храмы Духа Святаго пречестнии.

Радуйтесь, тесною евангельскою стезею шествовавшии;

радуйтесь, звезды, на тверди Небесней сияющии.

Радуйтесь, от страстей скорое освобождение; радуйтесь, Владычния обители похвало и украшение.

Радуйтесь, преподобнии отцы, усерднии о нас пред Богом молитвенницы.

Песнь 7

Ирмос: *Сушим в печи отроком Твоим, Спасе, / не прикоснуса, ниже стужи огонь. / Тогда трие, яко единеми усты пояху / и благословляху, глаголюще: / благословен Бог отец наших.*

Христови сраспеншесе, богомудрии отцы, / Тому единому всеусердно пожили есте. / Темже и Возлюбившему вас ныне с ликом преподобных поете и глаголете: / благословен Бог отец наших.

Руку спасения человеку некоему простерл еси, блаженне Варлааме, / егда в сонном видении тому явлься, / исцеление от недуга пианства обещах еси, / да пред образом Пречистыя и Предвечнаго Младенца Ея воспоем: / благословен Бог отец наших.

Исцеление от слепоты телесныя блаженному Гедеону даровавый, / исцели слепоту душ наших, боголюбезне Варлааме, / да просвещенными очесы узрим Господа и воспоем Ему: / благословен Бог отец наших.

Богородичен: Принесем песнь согласно Царице Небесней, / яко Небесную Чашу Своего милосердия нам источила еси / и Скорая Помощница в скорбех явилася еси. / Темже вси

возопиим: / радуйся, Заступнице Усердная рода христианского.

Песнь 8

Ирмос: *Егоже ужасаются Ангели и вся воинства, / яко Творца и Господа, / пойте, священницы, прославите, отроцы, / благословите, людие, / и превозносите во вся веки.*

О, пустыннолюбнии отцы Варлааме и Гедеоне! / Вы, зельным воздержанием плотския похоти от себе отгнавшие, / добродетелию целомудрия себе украсили есте. / Темже со ангелы превозносите Господа во вся веки.

Недугующим скорый целитель явился еси, отче Варлааме. / Не презри убо и нас с верою к мощем твоим притекающих, / но скоро услыши молитвы наша и подаждь помощь свыше, да вопием: / отроцы, благословите, священницы, воспойте, / людие, превозносите Господа во вся веки.

Во обители Владычней усердно подвизаяся, преподобне Гедеоне, / добродетельми, яко солнце, просиял еси. / Темже и возшел еси в Небесный чертог, / идеже сподобился еси прославляти Творца и Господа во вся веки.

Богородичен: Странно явление образа Неупиваемая Чаша и несказанно есть, /

чудотворная бо икона сия во обители
обретается/ и грешным людем Владычица
исцеления подает./ Темже благодарне вопием:/
благословенна Ты, Пречистая, во вся веки.

Песнь 9

*Ирмос: Живоприемный Источник
приснотекущий,/ светоносный Светильник
благодати,/ Храм одушевленный, Сень
пречистую,/ Небесе и земли пространнейшую,/
Богородицу, вернии, величаем.*

Честна воистинну смерть ваша, достославнии
отцы,/ преставилися бо есте от земли к
Небесным./ Обаче, предстояще Престолу
Вседержителя,/ и от нас духом не отступаете./
Темже непрестанно молит^е Троицу
Единосущную,/ спаситися душам нашим.

Райския пици причастницы явистеся,
преблаженнии отцы наши,/ и от Христа Бога
венцы славы приясте./ И ныне молитесь
прилежно о нас,/ верою и любовью творящих
честную память вашу.

Днесь творяще память вашу,/ преподобнии
отцы Варлааме и Гедеоне,/ похвальное пение
приносим вам и молим:/ веру Православную во
Отечестве нашем утвердите,/ обитель Владычню
сохраните/ и предстателие явитесь всем, с
любовию к вам притекающим.

Богородичен: Воспеваем Тя, Всемиловитая Заступнице рода христианскаго, / Ты бо всегда прилежно молишия о нас. / Темже, со умилением сердечным припадающе, тепле вопием: / сохрани нас от всякия напасти и беды / и спаси души наша.

Светилен, глас 5:

Свети святии, богоизбраннии Варлааме и Гедеоне! / Вы есте преподобным похвала, священником украшение, / христианом поможение / и граду нашему Серпухову великое утверждение.

Слава, и ныне, Богородичен:

Радуйся, Боголюбивая Царице, / радуйся, Мати Христа Бога нашего, / радуйся, обители нашея крепкое Заступление, / радуйся, Отечеству нашему Похвало и Утверждение.

На хвалитех стихиры, глас 1.

Подобен: Небесных чинов:

Днесь обитель Владычня торжествует, / прославляющи угодники своя, / богосветлаго Варлаама и добронравнаго Гедеона. / Тии бо, светом Христовых заповедей сияюще, / добродетельному житию нас научают / и, прошения наша приемлюще, / прилежно молятся Богу о спасении душ наших.

Усердно Христу последовал еси, / боголюбезне Варлааме, / воздержания правило и целомудрия образе, / добродетели рачителю⁴ и благосердия источниче. / Ныне же, яко ангелов собеседник, / райскую доброту богато зриши / и молишися о спасении душ наших.

Вышния доброты взыскуя, / преподобне отче Гедеоне, / мира и сущих в нем житейских отрелкся еси / и, послушания добрый рачитель быв, / терпением и смирением ангельския лики удивил еси. / Темже молим тя: / в послушании Церкви Христовой утверди нас.

Днесь духовный лик составльше, / торжествуем и радуемся, / прославляюще богомудрых Варлаама и Гедеона, / преподобно в заповедех Господних поживших. / Помяните нас, отцы преблаженнии, / у Престола Святыя Троицы / и испросите душам нашим мир и велию милость.

Слава, глас 8:

Светильницы присносветлии / явистесе миру, / преподобнии отцы Варлааме и Гедеоне, / монашескаго жительства истинное правило, / земли нашея пресветлое украшение, / целомудрия и чистоты образи. / Тех молитвами, Благоутробне Господи, / подаждь людем Твоим оставление грехов / и велию милость.

И ныне, Богородичен, глас тойже:

⁴ Рачитель - любитель

Владычице, прими молитвы раб Твоих/ и
избави нас/ от всякия нужды и печали.

На Литургии

Блаженны от канона, песни 3-я и 6-я.

**Прокимен, глас 7: Честна пред Господем/ смерть
преподобных Его.**

**Стих: Что воздам Господеви о всех, яже воздаде
ми?**

Апостол, к Галатом, зачало 213.

Аллилуия, глас 6: Блажен муж, бояйся Господа,/
в заповедех Его восхощет зело.

Стих: Сильно на земли будет семя Его.

Евангелие от Луки зачало 24.

Причастен: В память вечную будет праведник: